

## ARIQBAŞ ETEGİNDE

Yaş kedaynıñ qarşılıqsız aşqıdayın,  
Qır üstünde yanıp söndi qızıl-çabaq.  
Kel ekimiz, oynay-küle, taşqındayın,  
Suv boyundan tırmaşayıq qırğa taba.

Kel, Emine, kökke perde kerilgende,  
Suv boyundan qırğa taba yol alıyıq.  
İnce tuman tel-tel olıp örülgende,  
Arıqbaşnıñ eteginde cal alayıq.

Baq, bu tatlı, şeñ ömürniñ ağuşında  
Özen küle, bağ-bağçalar, dağlar küle.  
Baq, Belbekniñ erkelenip aqışında  
Ayat sesi, küreş sesi eşitile.

Baq, Emine, selbilerniñ arasından  
Seydam Qaya pısıp bizge qarayatır.  
Ay da çıqıp mor bulutniñ qorasından  
Şavlesini üstümüzge cayayatır.

Köresiñmi, kökniñ sırlı sergisinde,  
Allı-güllü melevşeler, güller açqan.  
Büllür suvniñ kümüş qaplı küzgüsünde  
Menim kölgem köletkeñnen quçaqlaşqan.

Menim kölgem köletkeñe kölge etken,  
Başın qoyıp seniñ sıcaq tizleriñe  
Ayt, güzelim, bu qadar sır qaydan kelgen  
O yaraşlıq, o manalı közleriñe?...

Ayt, Emine, bu seadet ocağında,  
Angi şair yanmaz yarıñ yaslısına?  
Tabiatnıñ bu cilveli qucağında,  
Angi Kerem türkü örmez Aslısına?

Kim istemez, kündüz işlep yorulğan soñ,  
Yar tizinde yorğunlıqtan arınmağa?  
Arınğan soñ, yañı quvet, ğayret toplaq,  
Saba işke taze küçnen sarılmağa.

Kel, Emine, kökke perde kerilgende,  
Suv boyundan qırğa taba yol alıyıq.  
İnce tuman tel-tel olıp örülgende,  
Arıqbaşnıñ eteginde cal alayıq.

*Kökköz köyü*  
1928 s.

### **“DNEPRELSTAN” poemasından**

Ey, Dnepr, ey tarihlar örekesi!  
Ey, çalarğan asırların köletkisi!  
Ayt, bu taşlar üzerinde yañğırdımı,  
Bir vaqıtta, qaçqınların açuv sesi?..

Cesetlerden köpür qurıp özen keçken  
Atillalar bu qırlarda adaştımı?  
Bir cüyrukke qızlarını berip ketken  
Peçenekler senmen mında çataştımı?..

Ayt, Dnepr, ayt dünyada körgeñni,  
Qıdırlezde yoldan çıqıp cürgeñni,  
Ev avdarıp, köy aqtarıp, şeer basıp  
Muradıña nasıl etip irgeñni...

*1931s.*

### **“BORAN” poemasından**

Ey, qardaşlar! Alıp beriñ  
Çüyden eski sazımnı.  
Alıp beriñ, tatarlıqı  
Acısını çalayım!

Çalayım da, elimdeki  
Şu qanlı mızrabımnı  
Tellerge ve yüreklerge  
Urıp-urıp alayım!

Sırttan boran ep borata,  
Kök qarara, yel iñley.  
Yel iñlemey, qızıl yıldız  
Pancasında il iñley.

Carılğaçtan – Azavğace,  
Çatır Tavdan – Orğace,  
Qolu bağı, közü bağı,  
Tili bağı qul iñley.

Ah, Qırımım, doğğan mesken,  
Neler ötti başıñdan!  
Yarıp baqsañ, er taşıñıñ  
Kökreginden ot çıkar.  
Otnen birge alevlene,  
Yana er bir taşıñda  
İlelebed, tek eki söz:  
“Ya ölüm, ya intiqam!”.

*Aqmescit – İrkutsk  
1941 – 1942.*

## **YOL BERME!**

Ey, afatlı boranlarda  
Çatallağan yaş yürek,  
Damırında qaynap turğan  
Qara qanı qurutma!  
Qan içici azğınlarını  
Halqqa bergen azabın  
Ömürbillâ bağışlama,  
Ömür billâ unutma!

Unutma sen o qarğışlı  
Qanlı uruş yılların,  
Şeer, köyler, evler içi  
Aizarğa tolğanın.  
Üç yaşında külkü nedir,  
Oyun nedir unutıp,  
Biñlep-biñlep sabiylerini  
Yolda yetim qalğanın...

Bizler körge horluqlarını  
Tüşünde em körmegen,  
Bizler içken çaymaçanıñ  
Lezetini bilmegen,  
Bir avuç qan içiciler  
Bugün kene qan istey,  
“Men yaşayım, men oynayım,  
Sen ömürlük çekiş” – dey.

Ey, afatlı boranlarda  
Çatallağan yaş yürek,  
Damırında qaynap turğan  
Qara qanı qurutma!  
Qan içici azğınlarını  
Halqqa bergen azabın  
Ömürbillâ bağışlama,  
Ömür billâ unutma!

*1956 s.*

## **Sekizliklerden**

\* \* \*

Baht arasañ, bar küçüñni  
Ber vatanğa, halqıña.  
Bu vasiyet bizge ulu  
Atalardan qalmadır.  
Aq ve vicdan, halq ve vatan  
Bir-birinden ayrılmaz.  
Bir almanı ekige böl,  
O ep bir şu almadır.

\*\*\*

Bir iş tutsaň, soňuna çıq.  
Küçlüklerden tartınma,  
Eger de halq faydasına  
Hızmet etmek isteseň.  
Bir bağçivan biň tikenniň  
Accısına qatlana,  
Bağçasında bir gülfidan  
Yetiştirmek istese.

\* \* \*

Tögeregiň egri olsa  
Doğru yoldan taypınma.  
Vidaniňnen bilip qullan  
Ağzıňniň qaşığın.  
Alçaqlardan örnek alma,  
Tabiattan ibret al!  
Gül kübrede yetişse de,  
Almay kübre sasığın.

\*\*\*

Büyük işke köz etip  
Küçüğinden kaçınma!  
Halqıň için er bir iş  
Bir-birinden elzemdir.  
Dağlarnı dağ etken em  
Kök aralaş çam ağaç,  
Em de yerge cayılıp  
Yatqan alçaq kögemdir.

\*\*\*

Ömür, ömür! – demek ile  
Ömür qolay bilinmez,  
Yaşayısta em tatalını,  
Em accını tatmasaň.  
Yazayatqan eseriňniň  
Dadı-tuzu sezilmez,  
Merekepke bir qaç tamlı  
Öz qanıňni qatmasaň.

1956 s.

### **“KÖZYAŞ DİVAR” pomasından**

Şair olsaň, şiriňe  
Oquycını tabındır.  
Onıň yürek tellerini  
İňlet, sızlat, alındır.

Şair olsaň, ömrüň boyu  
Halqnen sevin, halqnen kül!

Halqnen çekiş, halqnen ağla,  
Halqnen yaşa, halqnen öl!..

Ölü doğğan “şair” degil,  
Añlaşılmaz sır degil,  
Zır-zıbıldağ yumor degil,  
Çalma-çırma yır degil.

Qandırıcı nefis söznen  
Oquyıcı kütleniñ  
Şuurını genişletmek  
Olmalı tüp maqsadıñ...

El arzusu erkin olsa,  
El arzusun er aqlar.  
Şair közü mergin olsa,  
Şair namın el saqlar.

Özü malüm, er beyt yazğan  
Adam şair olalmaz.  
Böyle “şair” halq qalbinden  
Bir çımqım yer alalmaz.

Aksine, aşq qucağında  
Uçan suvday çağlağan,  
Er adımda öz bahtını  
Halq bahtına bağlağan,

Bir şeyge pek öküngende  
Efkârından yırlağan,  
Bir şeyge pek sevingende  
Göñlü coşıp ağlağan,

Sevgen işi üzerinde  
Gecelegen, künlegen.  
Amma özü qafiye ne,  
Vezin nedir bilmegen,

Yahşılıqçün yardan atqan,  
Ruhu zengin, gür adam,  
Güzellikten ğıda tapqan  
İçi-tışi bir adam,

Arzularğa baş olmağa  
Er kesten pek qadirdir,  
Doğıp şair yazmasa da,  
Eñ aqiqiy şairdir.

1958 s.

## İLHAM PERİM

Kel sen, muzam, ilham perim, körüñ mağa bir daa,  
Oğullarım, Saidemmen, kel eşit soñ sözüñni!  
Soñ nefeste suvuq ecel teri tökeyatqanda,  
Sıypap suvuq mañlayıñnı, yumdır nursuz közüñni.

Moskvaniñ fevral ayı. Yollar tolu insanğa,  
Torğayçıqlar, balaçıqlar çuvuldaşa azbarda.  
Er bir yerde ömür qaynay, külgü qaynay ....  
Menim ise, endi duyam, bir ayağım mezarda.

Tüşümdemi, esimdemi, yahşı farq etalmayım,  
Bedenimni sarıp alğan ağırlardan, eskeri,  
Qulağımı yırtma mağa soñ mekân qazayatqan  
Mezarcını qolundaki qazma kürek sesleri.

*Moskva*  
*1978 s. fevral 25*